

25-10-91

Sora M. Theodosina Berther

Ils 16 da settember 1991 ha ina considerebla gruppera da parents ed enconuscents – ils biars da Tujetsch – assistiu al survetsch divin e sepultura dalla defuncta sora Theodosina ella caplutta dallas soras da Baldegg. El vast santeri dallas soras, che fa impressiun entrais sia sempladad, ha ella anflau siu davos ruaus.

Sora Theodosina ei naschida sco Constanza Berther dils geniturs Tumaisch e Barla Catrina Berther-Venzin ils 18 d'avrel 1901 a Camischolas. Ella ei carschida si cun 10 fargliuns. Duas soras ein era entradas en claustra a Baldegg, sora Franziska e sora Cypriana. Sora Theodosina ei stada 69 onns en claustra, da quels 57 onns ell'Africa (1926–1983).

Las soras da Baldegg lavuran sin pliras staziuns en Tanzania en collaboraziun cun ils paders caputschins svizzers, aschia a Sambezi, Dar-es-salaam, Ifakara, Kwiwo e Ruaha. Da 1957–1969 ei sora Theodosina stada superiura generala da sias ca. 80 soras da Baldegg ell'Africa e quei sper igl aruestg Edgar Maranta digl uorden dils caputschins.

Treis qualitads caracteristicas lessel jeu specialmein menzunar: sia attaschadad a sia patria e famiglia, sia immensa forza da lavur e siu spért d'oraziun.

L'onda muniesa ell'Africa, sco ella vegneva numnada da ses fargliuns, nevs e niazas ha mantenui in contact regular cun sia parentella entrais corresponsenza en perfetg lungatg romontsch e biala scartira. Quellas bialas brevs vengnan a restar per beinenqualin in custeivel scazi. Duront ses congedis en Svizra



vegneva ella secapescha sin viseta a Camischolas.

Sco sora missiunara ha ella prestau immensa lavur, tuttavia sco sora da malsaus e sco scolasta da lavur manila. Cheu ha ella duvrav sia energia e forza da lavur entochen ch'ina ferma malaria ha sfurzau ella da returnar en claustra. Tenor ses plans quintava ella da saver murir ell'Africa.

Denton duront sia dimora en claustra ei sia tiarza qualitad semusada, siu spért d'oraziun. Suenter ton-tas activitads ha ella priu peda da far oraziun per sia carezada Africa, mo era per nossa Baselgia en Svizra e per ses parents e Tuatschins. Mintga di recitava ella tenor quellas intenziuns in rursari suenter l'auter.

Nus engraziein a sora Theodosina per siu urar e luvrar, rugond per clamadas missionaricas tier nus ed el vast mund dad oz. R.I.P.

sur Chr. Monn